

# Paul, Thessalonica Whut'enne 'Udechoo 'Udustl'us Buts'ó K'e Yanguz-i

---

Thessalonica whut'enne Paul hadih 'ubulhni

**1** <sup>1</sup>Wheni tane tsinli Paul, Silvanus, Timothy, nohni keyoh Thessalonica ts'e Yak'usda neBá 'en ba 'ilhunaoodulhne, hadih nohts'utni. NeBá Yak'usda 'ink'ez Sizi Gri neMoodihti ts'un nohba tenazdudli, 'et whe ye unzoo-i 'ink'ez nohdzi dizghel nohbulh oot'e'.

Hoonzoo k'un'a ne'hut'en

<sup>2</sup>Ahoolhyiz nohni nohghun Yak'usda ts'un musi ts'utni. Netenadudli toh nohnats'ulnih.

<sup>3</sup>Nohnats'ulnih-un 'aw 'etsul lhe'ts'usne, be 'alha 'uhoont'oh-i, 'i ghun noh'e'ut'en. 'Ink'ez be nék'ets'insi'-i be soo cho 'aht'en. 'Ink'ez neMoodihti Sizi Gri 'en ghun hukwa tse hoohli-un, 'aw whula lhduzahni. Yak'usda neBá 'en oonalh 'et ndaht'en.

<sup>4</sup>Neulhutsinke t'ets'oninzun Yak'usda nohk'entsi' 'ink'ez 'utáhanóhanla.

<sup>5</sup>'Et neghuni unzoo-i, 'aw khuni za iloh unli whe nohtl'a dífts'ut. 'Et hoonts'i be hoolhtus-i be 'ink'ez Ndoni gha cha, 'et nohtl'a dífts'ut. 'Et nts'en'a nohtl'a dífts'ut 'et whe la t'eeonuhzun ndi khuni 'i ts'ih'un un'a 'unt'oh. 'Et huwa 'oh da' nohtoh uzdilhts'i whe nohni nohba dant'ohne dune tsinli, 'et ts'iyawh t'eeonáhzun.

<sup>6</sup>'Et wheni 'ink'ez neMoodihti cha, nek'un'a 'aht'oh sahli'. Tube dzoh nusuhde whe Ndoni ye whunilhni-i, 'i be Yak'usda ooghuni unzoo-i hoonáht'i' whe ulhchoot.

<sup>7</sup>'Et nohni nohgha nts'oh tune' 'aht'en-un, 'et ndunne Macedonia 'ink'ez Achaia yun k'ut cha, ndunne Sizi Gri ooba 'alha' 'unt'ohne, 'enne nohk'un'a 'uhint'oh huzdli'.

<sup>8</sup> 'Et Macedonia whut'enne 'ink'ez Achaia whut'enne cha, 'enne neMoodihtih ooghuni, 'i ts'iyawh nohni nohgha huyulh 'udants'o. 'Et hoonts'i 'aw 'et za iloh, Yak'usda ts'un nohba 'alha' 'unt'oh-un, 'alhgoh ndulcho whe t'ehinanzin, 'et huwa wheni 'aw 'on 'un daja 'uzdooni' ait'oh.

<sup>9</sup> 'Enne didutch'oh nohni nohghun nebulh nahuhoolnuk 'et whe k'eke nedáhtni. 'Ink'ez nts'en'a 'uk'eltsi nohba 'alha' 'unt'oh-un, 'et whuch'a nasahdil whe Yak'usda ts'u nasulhya. Yak'usda, mbe khuna-un, 'ink'ez 'alha' Yak'usda unli-un, 'en za ooba ooht'en ha.

<sup>10</sup> 'Ink'ez ooYe', yak'uz ts'u hainya-un, 'en cha ooba sulh'i. Sizi 'en 'unt'oh. 'En yaidlane butoh dunaidilhti 'ink'ez Yak'usda ye nebulh hunilch'e-i negha tikulh-i, 'i ch'a neulhyis-un, 'en 'unt'oh.

### Paul Sizi Gri ba be 'ut'en k'oh 'unt'oh

**2** <sup>1</sup> Neulhutsinke nohnich'oh t'eeonahzun 'aw 'ants'et nohts'un nalhts'utidulh.

<sup>2</sup> 'Et keyoh Philippi, 'enne bugha tube dzoh nuts'uzde, 'et ts'iyawh t'eeonuhzun. 'Et hoonts'i hukw'elh'az Yak'usda 'en gha 'aw whelhts'itsaz whe ooghuni unzoo-i be nohbulh yats'ulhduk, lhat-un whe nedulhyoh 'uhant'e' 'et hoonts'i.

<sup>3</sup> 'Et ndi khuni ulhtus-i be nohbulh yaduk inle', 'aw tank'us lhe'it'oh, k'us dutsun-i bulh lhe'it'oh, k'us 'aw ntsi'-i cha ootoh hooloh, whuz un'a nohbulh yats'alhduk inle'.

<sup>4</sup> 'Et hoonts'i Yak'usda nebulh soo neonin'ai whe ooghuni unzoo-i, 'i be netl'a hon'ai, 'et whuz un'a za yats'ulhduk. 'Et hoonts'i dune hodutáts'o 'et hukwa' huninzun, 'i khuni 'aw whuz un'a iloh yats'ulhduk. 'Et k'us Yak'usda nets'u hukwa' ninzun-un, 'et za howu yats'oolhduk. Yak'usda 'en nedzi yoolhdzih.

<sup>5</sup> T'eeonahzun 'aw khuni 'uyoo unli 'i be iloh nohbulh yats'ulhduk. 'Aw hoonli aht'i-i, 'i negha óohlelh, 'et whuz un'a iloh nohbulh yats'ulhduk. 'Et Yak'usda nalh ts'ih'un un'a nohdusni.

<sup>6</sup> Nohni k'us 'uyoonne cha nedutalhti' hukwa lhts'etí'en, Gri ooba whel'a'ne tsinli 'ink'ez netl'a hon'ai 'et huwa be hóolhtus-i, 'i be nohando 'uts'int'oh.

<sup>7</sup> 'Et hoonts'i nohtoh uzdilhts'i da', nohts'un ts'inzoo. Nts'en'a ts'eke duduzke nulhyeh 'ink'ez buk'e hintsi', 'et whuz un'a nánilhtsulyaz nunóhts'ulh'en.

<sup>8</sup> Nohk'enitsinli, 'et huwa ts'uhooont'i' whe Yak'usda ooghuni unzoo-i be nohbulh yats'ulhduk. Be ts'ukhuna-i, 'i hoonts'i nohni nohgha huwázti'alh, nohk'ets'intsi' 'et huwa.

<sup>9</sup> Neulhutsinke soo cho whunalhnih, 'oh da' nts'oh tune' ts'ut'en 'ulhdzis 'ink'ez dzin 'i bulh lhla ts'óodat'elh! Tube neba howa whulna' t'eeonahzun, doo ka la nohba howa whulna' ts'uhoohltself 'et whuch'a. 'Et whuz un'a Yak'usda ooghuni unzoo-i be nohbulh yats'ulhduk.

<sup>10</sup> Nohni nohnalh 'uts'ut'en, Yak'usda cha, dalcho-i be teni' uznilhdzun 'ink'ez ts'ih'un un'a ne'ts'ust'en whe nohni ooba 'alha 'uhoont'ohne nohtoh nek'éholts'it whuch'a.

<sup>11</sup> T'eeonuhzun nts'en'a la nohbáke nohk'entsi' whe nohgha hanle', 'et whuz un'a nohbulh 'uts'int'oh. 'Et huwa khuni ulhtus-i be nohbulh yats'ulhduk, 'ink'ez k'e nánohts'uni'a. Datiht'elh-un, 'et whunoh uznulhtun.

<sup>12</sup> 'Ink'ez Yak'usda ba soo' whuldzoo' k'un'a toohdilh. 'En 'unt'oh nts'e la usda-un, 'et lerwe unli, 'et whe ts'iyantsuk whe k'une' whut'en unli, 'ink'ez ye diziti'-i cha bulh 'unt'oh. 'Et whuz de 'anih nohúlhni.

### Sizi Gri hits'u nalhya-un

<sup>13</sup> 'Et huwa wheni negha Yak'usda ooghuni dáhts'o 'et ts'iyawh hoonáht'i' whe ulhchoot. Yinka dune ghuni iloh k'un'a úlhchoot. 'Alha' hoont'oh Yak'usda ooghuni 'unt'oh. Ndi khuni 'i be 'on nus ulhtus nóhulhtsi. Nohni ooba 'alha' yint'ohne, ndi khuni ulhchoot 'et huwa 'etsul lhe'ts'udísni whe Yak'usda musi ts'utni.

<sup>14</sup> Neulhutsinke nyoonne Gri Sizi 'en ooch'e' unline, mbene Judea yun k'ut whe Yak'usda ba 'ilhunaoodulhne, 'enne buk'un'a 'aht'oh. 'Et ndunne Judea dilhts'ine, 'enne 'onghoh Lizwifne dzoh nubuhulhdeh, 'enne buk'un'a za nohbulh keyoh whut'enne, 'enne dzoh nunóhohulhde.

<sup>15</sup> Lizwifne, 'enne 'uhuja neMoodihti Sizi Gri hizilhghi. 'Ink'ez mbene la buba Yak'usda be nus hoo'enne, 'enne cha buhuhangan. 'Ink'ez wheni cha duyun k'ut hukw'u nanehuntízyoot. Ts'iyanne ch'az huditni, 'et huwa 'aw Yak'usda hoont'i' hukw'un'a nulh'éhust'en.

<sup>16</sup> 'Udun yun k'ut whut'enne hudoojih ha bubulh yaztilhduk, 'et whuch'a nehuniyoot. Ndunne Lizwifne 'uhuyulh'en-i 'et whe lubeshi be hudizbun. 'Et huwa Yak'usda ye bubulh hunilch'e-i, 'i 'ilhiz wheni huyulh 'utit'elh.

### Buk'e ninli

<sup>17</sup> 'Et neulhutsinke, 'atsulyaz wheni nohch'a nehunízyoot, 'et hoontsi' nedzi be nohbulh 'uts'int'oh. Tube cho nanohts'utit'elh-un, 'on nus hukwa ts'uninzun.

18 'Et huwa tube nohts'uztidulh hukwa' uznanzin. 'Alha' si, Paul, nat whucho nohts'u toosya' hukwa 'ist'en, 'et hoonts'i Satan 'en nedádinya.

19 'Et ndet 'uhoont'oh hukwa tse ts'uhooli, k'us ndai be ts'uhooont'i? N dai la neba 'uk'elha tileh-i, 'i be eh ts'oohootat'e'? NeMoodihti Sizi Gri nkede whusanatidalh 'ink'ez nohni cha ts'iyawh oobulh 'utiht'elh, 'et za 'uhoont'oh!

20 Nohni be uzdziti'-i, 'ink'ez be ts'úhoont'i'-i 'ahli 'et huwa.

### Buba 'alha 'uhoont'oh-un, 'et huwu ninli

**3** 1 'Et huwa 'aw 'on 'un whulh ts'ooyin ait'oh sulí'. 'Et neba hoonzoo nídzun whe whenich'oh keyoh Athens íke'.

2 'Inka ndun neulhutsin, Timothy Yak'usda ba ne'ut'en-un, 'en nohts'u whe ts'alh'a'. 'En 'unt'oh Gri ooghuni unzoo-i ooghá ts'ana nela 'ut'en-un. 'En gha nohba 'alha 'uhoont'oh-un, 'et whuz un'a 'ilhez oole' hukw'un'a za 'utiht'elh, 'ink'ez dughuni be nus nohnilt'i.

3 'Et njan dune dzoh nuneulhdeh-un whe nohba dzoh oole' junih. Nohnich'oh t'eeonahzin njan neba' hóolya whe' hoont'oh.

4 'Et nohzih íke' whe dzoh nuztideh whe' hoont'oh nohdát'ni' inle'. 'Et whuz un'a 'uhooja 'ink'ez k'an 'et t'eeonahzun.

5 'Et huwa si cha 'aw 'on 'un whulh óosyin ait'oh. 'Et huwa Timothy, 'en nohts'u whes'a' whe be 'alha 'uhoont'oh-i ghun daht'oh ts'iyawh neba nahoota'alh. Doo ka si mbe la neóolhdzih-un, nohni cha tilah nohóolhdzai de, 'et de ne-e'ut'en 'ants'et 'utit'elh.

### Timothy daja nedani'-un, 'et huwa nedzi hoont'i'

6 'Et 'andit Timothy nohts'u ha nája. 'Ink'ez daht'oh la 'et hukw'un nebulh nahoolnuk. Ndi be 'alha 'uhoont'oh-i, be nek'etsi'-i cha, 'et ts'iyawh nawhus'ai. 'Et nets'un ahzoo 'ink'ez wheni netih'elh hukwa' nahzun, 'et cha hukw'un nebulh nahoolnuk. 'Ink'ez wheni cha whuz un'a za nohuzti'elh hukwa' 'uzninzun.

7 'Et huwa neulhutsinke 'uyoonne gha dzoh nuts'udeh 'ink'ez dzoh nebulh 'uhoont'oh, 'et hoonts'i be 'alha 'uhoont'oh-i aht'i, 'et 'i be nedzi do na'uja.

8 'Et neMoodihti 'en ba ulhtus whe nídulhya de, 'et ts'ukhuna.

9 N dai be ts'oohoont'i'-i, 'i be ts'iyawh Yak'usda but nohba ts'uhooont'i'? Nts'en'a suba soo 'ulcho-i be Yak'usda nohba musi uzdóni'?

10 Be 'alha 'uhoont'oh-i aht'i-un, ndet la ts'ih'un t'eeonuzahzun 'et ts'iyawh nohba lhats'odutileh. 'Et huwa 'ulhdzis 'ink'ez dzenis 'i bulh tube Yak'usda oots'o hukwa' ts'utni. Nohts'uti'elh hukwa' ts'uninzun.

**Yak'usda ba 'ilhunaoodulhne buba tenahududli**

11 'Et Yak'usda 'en dich'oh neBá, 'ink'ez neMoodihti Sizi Gri, 'en nohts'un nétoolh'a' ha tenazdudli.

12 'Ink'ez nts'en'a whe nohk'ets'intsi', 'et whuz un'a neMoodihti 'en gha tube cho lhk'uz te lhk'ehtsi'. 'Ink'ez 'uyoonne cha 'enne ts'iyawh nducha buk'ehtsi'.

13 'Et whe neMoodihti Sizi Gri 'ink'ez ooch'e' unline, 'enne ts'iyawh whusanahidil de, 'et de la neBá, Yak'usda, 'en nalh, 'aw nohdzi be ye nohk'e ho'alh-i hootaloh, 'ink'ez nohlubeshi cha hootaloh.

**Lubeshi bughu hooloh 'et buts'u hukwa' ninzun**

4 <sup>1</sup> 'Et huwa neulhutsinke, ndi 'udek'ez khuni be nohbulh yáts'ulhduk-i, neghuni úlhchoot whe Yak'usda hót'e' ha tóohdilh nohts'útni inle'. 'Et doo cha za whuz un'a za Sizi neMoodihti, 'en be khuni ulhtus-i be nohts'utni, tube cho lhan'un te oohzoo', 'ink'ez whuz un'a ooh'te'.

2 T'eoonuhzun neMoodihti Sizi khuni netl'a ídanla, 'i ts'iyawh nohts'udani'.

3 'Et Yak'usda ba 'udun nenohninlane, lhghu lhdúlhts'i whe lhulh ninta' ooh't'en junih, 'et whuz un'a Yak'usda nohba hukwa' ninzun.

4 Ts'iyawh 'ilhoghun 'ahli nohyust'e 'i Yak'usda ba 'udun neóolhtelh huba' hoont'oh 'ink'ez soo cho ooghohle'.

5 Nohyust'e hoolhtus whe lubeshi ts'u nint'i, 'et 'aw whuz un'a 'aht'oh iloh! 'Udun yun k'ut whut'enne, Yak'usda t'enuszunne, 'aw 'enne buk'un'a iloh 'aht'oh.

6 Khun te neulhutsin unline neghá whunist'en whe bu'at bulh ninta' ts'oot'en junih. 'Et whuz un'a za whutsoda' nohdasni'. 'Ink'ez doo cha za nohdusni, neMoodihti 'en za ndóohoont'oh-un huwun k'útneh-un 'unt'oh.

7 Yak'usda 'aw 'ut'en entsi'-i 'uztilh'elh huba iloh uzdoojih ha neka' dani! 'et huwa. 'En ba lubeshi ooghu hoolohne 'uztileh ha neka' dani!.

8 'Et huwa mbe la ndi khuni hidots'o hukwa lhe'hunizun, 'aw dune ch'az nult'ine lhuhiloh. Yak'usda ch'az nult'ine za 'uhint'oh.

'Ink'ez Yak'usda Ndoni 'en cha negha inin'ai-un unli.

**Ndi yun k'ut whut'enne, 'enne bunalh ts'ih'un un'a toohya'**

9 Lhulhutsinke yé lhk'esi'-i, 'i ghun 'aw nohts'o k'e'oosges huba lhe'hoot'oh, Yak'usda dich'oh whunohodalh'e' lhk'e oohsi' ha.

10 'Et whuz un'a ndaht'en ts'iyawh neulhutsinke Macedonia yun k'ut dilhts'ine, 'enne buts'un. Neulhutsinke khuni ulhtus-i be nohts'utni, lhan'un te lhk'e oohsi'.

11 'Ink'ez cha, nánilhtsulyaz yun k'ut dólhts'i', 'ink'ez noh'e'ut'en za noolh'en. Nohnich'oh nohla be ooh't'en. 'Et whuz un'a edóht'en nohts'udáni'.

12 'Et whuz un'a ndaht'oh de, 'et de mbene la ooba 'alha' lhe'hoot'ohne, 'enne bunalh soo ts'ih'un un'a toohya'. 'Et whe 'aw hoonliyaz ets'uhólhдох ait'oh.

### Sizi Gri whusanatidalh-un, 'et whut'aniznintan

13 'Et sulhutsinke, ndunne 'uda' nanistezne,<sup>a</sup> 'enne bughun t'ewhutihzeh nohba hukwa' nuszun. Ooba 'alha' lhe'hoot'ohne 'aw buba whula nalhuhóo'oh hukw'un'a ts'odi hinli, doo ka si whuz un'a ndoht'e'.

14 Sizi dazsai 'ink'ez dunadija-un, 'et neba 'alha' 'uhoont'oh de, 'et whuz un'a za mbene la Sizi ooba 'alha' yint'oh whe yahadlane, 'enne ts'iyawh Yak'usda Sizi bulh whusanahutidulh.

15 'Ink'ez neMoodihti ooghuni be njan nohdusni, neMoodihti neka whusanatidalh-un, nts'en'a la dawhutanelh-un, mbene la 'awhuz khunane, 'et ndunne nanistezne, 'enne 'aw butso uztoodilh ait'oh.

16 'Et neMoodihti dich'oh soo 'ultus-un hutiyih, 'ink'ez lizas 'uk'enus dizti'-un, 'en cha dutinelh, 'ink'ez Yak'usda ba be ts'ujih-i, 'i cha 'udutinelh. 'Et whuz un'a Sizi Gri yak'uz ts'e whusanatidalh. 'Ink'ez ndunne Sizi Gri ooba 'alha' yint'ohne, 'et whuz un'a yaidlane, 'enne cho dunahudutádulh.

17 'Et hukw'elh'az wheni 'awhuz khunane, 'ink'ez ndunne cha, 'alghoh 'aw lhts'odutílh'el whe khun be' ne-eduzgooh le' ts'uja whe ndo kw'us toh 'alghoh neMoodihti tazai ooduzdutádulh. 'Et whuz un'a 'ilhiz wheni neMoodihti bulh 'úztit'elh.

18 'Et huwa ndi khuni 'i be ts'iyawh k'únulhunooh't'ah.

### NeMoodihti oodzin dawhútanelh-un

**5** <sup>1</sup> Neulhutsinke nkede 'uwhutanelh 'ink'ez nts'oya hoozulh whe' whutanelh, 'aw 'et huwun nohts'o k'e'oosges ait'oh.

<sup>2</sup> Nohnich'oh soo ts'ih'un un'a t'eeonahzun 'undunut'ih-un k'un'a 'ulhdzis whusanúl'ih, whuz un'a neMoodihti oodzin neba whusaootilts'ulh.

<sup>3</sup> Dalhúhoot'oh 'ink'ez 'aw howa lhe'oodli, hutni te, 'et khuntsul bubulh ha oodults'uk. Ts'ekoo ulchane bubulh 'útults'ulh, 'et whuz un'a 'et nduwhutanelh. 'Et de ndutnine, 'enne 'aw buyit 'uhóneh ait'oh.

<sup>a</sup>4:13 Yaidlane ni whe 'utni

4 'Et hoonts'i nohni sulhutsinke 'aw tsalhgus yo lhdúlhts'i. 'Et huwa njan dzin whusahoolts'ut de, 'aw 'undunut'ihne k'un'a nohgha óonol'ih ait'oh.

5 Nohni be hoot'en-i 'ink'ez dzenis be hoot'en-i, 'i niz dulhts'i. 'Aw wheni 'ulhdzis 'ink'ez tsalhgus yo lhts'u dílts'ih.

6 'Et huwa 'uyoonne k'un'a lhts'oostez, whenich'oh khuts'oodle'.

7 'Et huwa mbene la stezne, 'enne 'ulhdzis hoot'ez. 'Ink'ez ndunne tatnaine, 'enne 'ulhdzis tahunutnih.

8 'Et hoonts'i wheni dilhts'ine, soo whunih be 'uts'oot'e' huba' hoont'oh. Neba 'alha' 'unt'oh-i, 'ink'ez be lhk'e ts'utsi'-i, 'i lhuztih dzoot k'un'a nohba le' tit'elh. 'Ink'ez be uzdujih-i, ooka tse ts'uhooli-i, 'i ts'oh duts'un-i k'un'a nézdol'a'.

9 'Aw Yak'usda ye huske-i, ba iloh 'uneinla, 'et huba iloh 'udun neneninla 'et huwa. 'Et k'us neMoodihti Sizi Gri 'en gha be údzutijih-i, 'i ts'itálhchulh.

10 Neba dazsai. 'Et huwa nts'oh dahooja hoonts'i, 'awhuz ts'ukhuna k'us yats'adla, wheni ts'iyawh 'en bulh 'uts'oot'e' huba' hoont'oh.

11 'Inka 'ilhone 'ahli whe k'únulhunaht'ah 'ink'ez lhba nus lhúnulht'i. 'Andit daht'en la whuz un'a za 'et ndaht'en.

### Lhelhts'un un'a ndi yun k'ut 'uzdólt's'i

12 Neulhutsinke wheni soo cho nohts'u tezdudli, mbene la nohtoh Sizi Gri ba 'ut'enne, 'enne neMoodihti gha nohghu hinli 'ink'ez nohba huwhunih nunats'uhulye', 'enne 'unt'ohne nohba hoole'.

13 'Et bube 'ut'en gha nchane ubulh'ih. Be nek'etsi'-i, 'i gha ndaht'en. Ts'iyawh nanilhtsulyaz lhtoh dune 'ahli.

14 'Ink'ez neulhutsinke khuni ulhtus-i be njan dunohts'utni, ndunne nohtoh tsedutnine soo cho bugha dahtni. Mbene la oodzi yo 'unt'ohne, soo nenabunih'ah. Yak'usda ba tetsunne cha bula 'aht'en. Ts'iyanne nánilhtsulyaz né'boolh'en.

15 Mbe la hoontsi' nohts'un 'uja-un, khun te hoontsi'-i be buba 'uk'elha hoolhtselh junih! 'Et k'us nohnich'oh cha 'ink'ez 'uyoonne ba cha, ndai unzoo-i ts'unóoht'i, 'i za lhunihdulh.

16 'Ahoohyiz whunulhni.

17 Tenadahdli-un, 'etsul 'udóhni junih.

18 Ts'iyantsuk whe musi dahni. Sizi Gri 'en gha 'et whuz un'a Yak'usda nohts'u hukwa' ninzun 'et huwa.

19 Ndoni whunóhnulhtun-un khun te dah noohzin junih.

20 Khuni be nohba nus be hoot'en-i, khun te 'ants'i 'uhoont'oh noohzin junih.

21 Ts'iyantsuk naoodúlhdzih. Ndai la unzoo-i duts'o cho oohtun.

22 Ntsi'-i ts'iyawh ooch'oh 'aht'oh.

**Yak'usda ye unzoo-i nohbulh óot'e'**

23 'Et 'awet Yak'usda, be nedzi dizghel-i negha nin'ai-un, 'en nohni dich'oh duba 'udun nenóholelh-un. 'Ink'ez nohyust'e, nohzul, nohyughi, 'alhgoh 'aw hoonli whe nohk'é holts'it-un hooloh whe neMoodihti Sizi Gri whusanatidalh whuts'un, 'et whuz un'a Yak'usda nohba' hooleh nohba hukwa' nuszun.

24 Mbe la dutijih ha nohka dani'-un, 'en 'aw nela dootnih ait'oh, 'en nohba' whutilelh.

25 Neulhutsinke neba tenadahdli.

26 'Et lhulhutsinke nalhutulh'ih te soo cho dushih be' lhoodhtun whe lubeshi ooghu hooloh-i be nalhudahts'oos.<sup>b</sup>

27 NeMoodihti nalh 'unohdusni, neulhutsinke 'enne Yak'usda ooch'e' unline, 'enne ts'iyawh ndi 'udustl'us buba ook'u yaoolhduk.

28 NeMoodihti Sizi Gri, 'en ye unzoo-i, 'i nohbulh óot'e'. 'Et ndo honeh.

---

<sup>b</sup> 5:26 Whuz keyoh 'et whuz un'a lhlá nuhút'a.